

Flurina Badel

Il champ

na
na
jau na vi betg
ir ora
jau rest
qua
stun en letg e spetg
jau ves il dadora tras la fanestra
sco in maletg vi da la paraid
il maletg sa mova en il maletg
trembla
la feglia dorada da la planta
in radi da sulegl la enlatscha
bitta sia sumbriva sin
mia cuverta da letg
jau sun sgiagliada sco ina giazla
jau na vegn betg
il dadora vegn en tar mai
il gizzar la fautsch
l'odur ascha dad
erva tagliada
sa maschaida cun quella dal lenziel e
cun la mia
da l'ultima notg
jau rest qua
jau sai bain co ch'i ves'ora là ora
jau sun gia stada là
enturn il champ vast stat schuschurond
dascus badugns
sco nivels sco plimatschs
stattan ils badugns là
jau conusch il champ vast
da quest temp è el segà
puschels d'erva verda malmadira cre-
schan
suenter

na dattan betg anc luc
il champ è bletsch da l'ultima plievgia
cun mintga pass sfundrassa lom
rodas da tractor han relaschè lur fastizs
il fund chavà stgarpà
rut si
naira terra torturada
rutta ora
marscha stancla
là nua ch'ils fastizs èn il pli profunds
èn sa furmads puzs
aua tievia
il tschiel sa reflecta en els
dus badugns
la feglia dals badugns
trembla
cur ch'in arogn sfurmicla
sur l'aua
jau guardass ensi
drizzass mes eglis dals badugns spievlags
sin ils badugns che stattan là
e jau vess
là è mo in unic in badugn sulet
ch'è sa spievlà en l'aua è sa
sfess
smesa
m'ha fatg crair ch'el na saja betg sulet
in champ sco tut ils champs
verdmellenoranschotschenbrina feglia
per terra
bittada
da ligerezza negligenta
na jau na vi betg ir ora jau na vegn betg
jau conusch las plajas
mo
las nattas na conusch jau betg